

Ca Mel Si Ho A Mel, Arsaesael Nga?

Ca ddei si ho a mel, ggecir ddei yoxl a nilhar loxr nia. Arbosobo ddei sul ber gga vaexr dae a bbeix:

“...Ni mel nilhar bei teixl lei yel nilhar loxr xixl nia,” eine bbeix a.” (Cuaxlsixljil Sul 3:19)

Arbosobo ddei sul ber gga yoxl a vaexr dae a bbeix:

Ca mel azo pex dae mel, zzeir mel lei azo pex dae, pex dae mel lei ciryoxr a nga; eil ddei arsae si mel, hal ddei lei arsae si, seixl qir lei ciryoxr a nga. Ca mel yirwu-nilhax mel leil naxrcixl nr leixl maelmaerjjia lei nilme gga ddux lei, maelmaerjjia lei nilme gga ddir jjixr. (Cuaxrdoxl Sul 3:19-20)

Ca ddei si ho a mel, xiu ddei halae arddolcar ci a lei gol doxr dae nia. Arbosobo ddei sul ber gga vaexr dae a bbeix:

Middurzzar nilhar mel gga yixr dae ca cirke a lei zucur nia. Cirmelmel a nael arddolcar ci a lei gol dae nia; cirmelmel a nael seixlda nia, arddolcar ci a lei yaa leil vuxryixr doxr nia. (Daxlyirlir Sul 12: 2)

Ni si ho a, yarzi seir ggie bbeixsael yarzi nr seir ggie ssi nia? Arbosobo ddei sul ber gga gurlir eine eil ddei zza:

Cabessor ar ddei zza, jjiussi yixrsaexr nei zzir naxrcixlcixl bei teixl lei pia mel veixr dae a, cirni-cirni yarzi goxrseir nixixl goxr dae. Yoxl casolssor ar ddei a mel yar ggucirmi guir dae. Yar leil Lasaluxl mi. Yar cingge-circir lei ggierggier dae. Yar yarzisael cabessor ddei zaezir woxrke zzor pixl dae mel ggux lel niazzir, anol lei lei a yar ggier zzu leil laexr lei.

Giedae yar si a. Tisir mel yar leil ca si ho a ssi ggie gga Yalboxrlahar dax hier mal a. Cabessor ddei lei si a, giexlhex a.

Ca Mel Si Ho A Mel, Arsaesael Nga?

Yar ca si ho a hher ggje hher dae a goxrsol zildu a. Yar nalbbor i dae a, Yalboxrlahar leil vimir ggje hher ggje mia a; yoxl Lasaluxl yar dax cirgo a hher ggje mia a. Yar dder ae dae a bbeix: “Ngo ddei porpor Yalboxrlahar, ngo leil arleixr zoxlnixr la! Lasaluxl leil miardal a leixrni oldde ddei leil ajjix ardoxr niul a, ngo leil lo ddei leil ardoxr zzaso lol la. Ngo adoxl ddei gga hher dae a yarzisael taxl no.”

Nael Yalboxrlahar bbeix: “Albor, ni arleixr holcir nia, halleix ni hormo goxrseir goxr a; Lasaluxl hormo goxrsol goxr a. Eilboxl yar eilmaex hher dae a goxrseir a; nael ni zzael goxrsol a. Halae, niul agala gga mel arsae neixlneixl lagiex giex dae. Ca mel eilmaex a ni dax halmaex ssi nr cexr; halmaex a ngua dax eilmaex lei nr cexr.”

Cabessor ddei bbeix: “Porpor, eine nga a, ni leil qiuxr ni Lasaluxl leil miardal a ngabbor ake ssi lol. Ngo arzzi-nimar ngorler zza. Lasaluxl leil yaa leil bbeix gger zaxr ssi lol a, ngo dax eilmaex goxrsol ggje tor nr lei lol.”

Nael Yalboxrlahar bbeix: “Ni ddei arzzi-nimar mel Moxrxi nei xiezi vaexr dae sul mel zza; yaa ddar halmel noni cexr.”

Yar bbeix: “Porpor Yalboxrlahar, nr nga bbae, ca si ho a gol du xixl lei ar ddei a yaa dax halmaex ssi a, yaa dder huixrsoxr var.”

Nael Yalboxrlahar bbeix: “Yaa Moxrxi nei xiezi vaexr dae sul ber leil no-nr-ni arddeirnga a, ca si ho a gol du xixl lei ar ddei lei a lei, yaa halae noni dil nr ddo.”

Ca cirddei-hanga lei ar boxl si nia, si ho a Arbosobo yaa leil ser nia. Arbosobo ddei sul ber gga vaexr dae a bbeix:

Ca Ddei Ssor ddei yarzi ddo yarzi quexrlxl zza zzirmar bei jjixr lei a yar ddei tisir maelmaerjjia yar dax cirgo a jjixr lei car, yar, yar cux ggie zzirmar baxrde hal taex leil cux dae nia. Mer woxrke ca circuxr-hanga lei yar meixsaer qir leil hher dae a, yar yaa leil bbe kae gger nia, hherdder yaloxlmo mel acixl nei ya mel leil bbe kae gger sael a nga. Ya mel leil nael yo piar a gga hher dae lol, acixl mel leil nael vael piar a gga hher dae lol.

Yel zzirmar ddei dder yo piar a gga hher dae mel leil bbeix: 'Ngabbor seir lol dae ca mel, nia Merhhexr ddei goxr ddei gga ddir lei ddo a. Merhhexr ddei goxr mel mer lei nr coxl seir, mi lei nr coxl seir dder nia leil bei har zaxr gger dae a. Nia mel ngo meixr car, ngo leil zol; ngo sixl car, ngo leil da; ngo simer-yarddei leil ssi za dae a, ngo leil nia dax hher lol; ngo veixrddu nr zza a, ngo leil veixrddu gger; ngo no a, ngo leil guaxr; ngo leil ge ji dae a, nia ngo leil i lei.'

Nixmox seir su ca mel ddarkoxl a bbeix: 'Seirpor, ngua arddolcar ni meixr ggie mia a, ni leil zol; ni sixl ggie mia a, ni leil da a leir? Ngua arddolcar, ni simer-yarddei leil ssi za ggie mia a, ni leil ngua dax hher lol, bbeixsael ni veixrddu nr zza a, ni leil veixrddu gger a leir? Yoxl arddolcar, ni no ggie mia bbeixsael ni leil ge ji dae ggie mia a, ni leil i lei a leir?'

Zzirmar ddei yaa leil ddarkoxl a bbeix: 'Ngo nia leil yarzi bbeix gger, nia ngo ddei arzzi-nimar ye zzir ar ddei leil eilmel bei gger a mel, hherdder ngo leil bei gger dae a.'

Zzirmar ddei yoxl vael piar a gga hher dae mel leil bbeix: ‘Arbosobo nia leil faxr dae ca mel, ngo dax tor nr hher. Nia neir zzirmar nei neir mel leil bei har zaxr gger dae, cirse-cirsil lei adoxl bbiu zil nixixl nr zza, dixlyuxl ddei gga ddir ddo a! Nia mel ngo meixr car, ngo leil nr zol; ngo sixl car, ngo leil nr da; ngo simer-yarddei leil ssi za dae a, ngo leil nia dax nr hher lol; ngo veixrddu nr zza a, ngo leil veixrddu nr gger; ngo no bbeixsael ngo leil ge ji dae a lei, nia ngo leil nr guaxr.’

Yaa dder ddarkoxl a bbeix: ‘Seirpor, ngua arddolcar ni meixr, bbeixsael sixl, bbeixsael simer-yarddei leil ssi za dae, bbeixsael veixrddu nr zza, bbeixsael no, bbeixsael ge ji dae ggie mia a, ni leil bei-nr-jjiu a leir?’

Zzirmar ddei yaa leil ddarkoxl a bbeix: ‘Ngo nia leil yarzi bbeix gger, nia ngo ddei arzzi-nimar ye zzir ar ddei leil eilmel bei nr gger a mel, hherdder ngo leil bei nr gger a.’

Yel ca eilmel mel cirse-cirsil lei ca leil faxr ggie ssi nia, nixmox seir su ca mel nael cirse-cirsil gol dae nia.” (Martaexl Sul 25: 31-46)

Arbosobo mel bbaehhex, yel yar arsae bei lei zuixl mel leil faxr nia. Arbosobo ddei sul ber leil bbeix, sirnilni nr ddux a mel, zuixl mel leil ssoxrsuxl nr cexr. Arbosobo ddei ssor Yisu zuixl nr zza a mel, yar dder niul ca maelmaerjjia leil zuixl nr zza lol ziddu ddei bei cexr. Yar niul ddei zuixl mel leil weix a faxr lol yuex, halae Arbosobo ca mel leil perniar a, yar yar leil niul ddei dirtu bei lol yuex. Yar leil sixrzixljiaxl ddei leil diexr zil gger car, yar mel niul ddei dirtu a.

Arbosobo ddei sul ber leil bbeix, niul mel acixl ya sael a jjiumo ssi pixl a, cirddei-hanga lei armael arsae bei niazzir arsae bei; nael Arbosobo niul ddei zuixl mel leil weix a Yisu leil faxr ho a. Ni Yisu sixrzixljiaxl ddei leil si a mel ni ddei zuixl mel leil weix a si ddarzzi a mel, ni leil dder jiuxl wo a; niul mel maelmaerjjia lei zuixl bei a; niul ddei zuixl mel leil mel arsae bei lei faxr nia, yel ni armael leil jiuxl bbesur nr zza. Seirceix-seirmaer ca ar ddei nr zza; ca cirddei-hanga lei Arbosobo yar leil ssoxrsuxl lol nia. Nael Arbosobo yar ddei ssorzil leil ca mel leil jiuxl lol eil ddei mel ca mel leil baexrbaexr nei meixl gger dae arddeir a; ca mel ddoddo-nrddo li nia nr nga. Ni, ni ddei zuixl mel li wo mibbe ddei ni leil ddeix lol niazzir arddeirnga a mel, ni dder dixlyuxl gga mibbe. Ni Yisu leil ni ddei zuixl mel leil daexljiaxl fuxl gger lol niazzir arddeirnga a, ni Arbosobo leil ‘ni mel ni zuixl zza ca ar ddei a saexl, ni yar ni leil weix a bei dae hazza leil ddarzzi, Yisu ni ddei zuixl mel leil weix a sixrzixljiaxl ddei leil diexr zil a ddarzzi’ eine bbeix gger cexr. Ni arsae bei lei eil ddei leil ddarzzi nia, eine nga a, ni leil dder ssoxrsuxl cexr. Yisu mel ni ddei zuixl mel leil weix a yar leil faxr lol ho a; ni leil zeixleixr lei faxr nr ssa a. Arbosobo mel Yisu leil gol du xixl lei lol ho a; si ddei leil mel bei leixl gger ho a; yel ni si ho a ni leil gol du xixl lei lol a merlabbor Arbosobo dax cirgo a hher dae lol nia. Eil ddei mel Arbosobo niul leil meixl gger dae niul leil jiuxl cexr seirseir ddei nga a.

Arbosobo ddei sul ber gga vaexr dae a bbeix:

Ni meir ddei gga “Yisu mel Seirpor a” cexrssexl halae nixmox zzar Yisu si a Arbosobo yoxl yar leil gol du xixl lei lol eine ddarzzi a mel, ni leil dder jiuxl wo ddo. Niul nixmox zzar Zidu leil ddarzzi dae a mel dder Arbosobo niul leil zuixl nr zza i mal gger. Niul meir ddei gga “Yisu mel Seirpor a”

Ca Mel Si Ho A Mel, Arsaesael Nga?

cexrssexl a mel dder niul leil jiuxl wo a. (Loxrmar Sul 10:9-10)

Arbosobo ddei sul ber yoxl bbeix: Ha Seirpor ddei leil qiuxr su ca mel, yaa leil jiuxl wo nia. (Loxrmar Sul 10:13)

Ni Yisu leil ddarzzi niazzir a eine biar nia:

“Arbosobo, ngo mel nr seir cirke bei goxr a, ngo ni dax huixrsoxr lei. Ni Yisu leil ngo leil gger a ngo ni leil nawo a. Seirpor Yisu, ni ngo leil weix a sixrzixljiaxl ddei leil diexr zil a ngo ni leil nawo a, ni ddei sirnilni mel ngo ddei zuixl mel leil ssorsuxl a ngo ni leil nawo a. Seirpor Yisu, ngo ni leil ddarzzi, ngo ni leil qie, ni ngo nixmox zzar ddir lei. Ngo, ngo ddei olga ddei ni leil jia gger yuex, cirse-cirsil ni dax mae yuex. Ngo ni leil nawo a: ni ngo leil ni leil saexl lol la, Yisu ddei mi leil koxl dae a bbeix, amae.”